

Nā te kaiētita manuhiri, a Tā John Kirwan

He hōnore nui tēnei mōku kia whai wāhi mai au hei ētita manuhiri mō te New Zealand Herald i tēnei rā. I taku whakaaetanga ki tēnei mahi kātahi tonu ka mārama haere au ki te hiranga me te kawenga nui o te ārahi i tētahi nūpepa rongonui, whai mana hoki. Heoi anō, ahakoa te hiamō o taku ngākau, ka tau mai te āwangawanga ki a au, arā 'me pēhea e oti i a au tēnei mahi? Ā, kāore kē nei i te paku aro i a au tēnei mahi!' He mea hou katoa ki a au tēnei nō reira ko te tūmanako ka eke i a au te taumata e tika ana. I te mea ko au te kaiētita manuhiri tuatahi mō te Herald, e kore rawa au e hiahia kia hapa au!

Ka noho au ka whakaaro ake mō ngā āhuetanga ka taea e au hei kaiētita, ka whakaaro au mō ngā mea e kaingākau ana au me te tūmanako ka pai anō ki a koe, tae atu hoki ki ngā take nui e pā nei ki tō tātou tāone nui whakaharahara, ā, e hiahia ana au ki te whakaputa i tērā. Mai i te kaipāmu i te raki ki te tangata e noho ana i te taha moana o te uru, ki te pokapū o te tāone nui e haruru mai nā, he tino rerekē te āhua noho a te tangata engari he iwi kotahi tātou o Tāmaki Makaurau. Ki a au nō Te Moananui-a-Kiwa katoa tātou i te mea ki ōku whakaaro ko Tāmaki Makaurau te kaiwhakakotahi i Te Moananui-a-Kiwa ki te wāhi kotahi. He kaha te kitea mai anō o te iwi o Āhia, arā he Hainamana, Kororia me te Hapanihi ngā hāpori kei konei nō reira ko tētahi o ngā whāinga nui māku ko te kauawhi i tērā me te tuhi kōrero ki ngā reo o ēnei iwi e noho ana i tō tātou tāone nui. Ahakoa pea i ētahi wā ka ngaro te ia o te kōrero ina whakamāoritia he kōrero engari mā te pānui korero i roto i tōu ake reo ka mōhio koe kei te whai whakaaro atu mātau ki a koe. E mōhio ana mātau kei konā koutou, ā, he uaua te whakamāori kōrero ia rā nō reira he tohu nui tēnei ki a koutou.

Kei mua o te nūpepa o tēnei rā e whakaaturia ana taku ngākaunui mō Tāmaki Makaurau, nā tētahi kaitoi o te rohe nei a Allan Wrath i mahi. E whakaatu ana i ngā mea pai katoa o Tāmaki Makaurau me ana kaupapa nui whakaharahara ka tū puta noa i te tau. Ko te tūmanako ka whakairihia e koe te pānui hirahira nei

ki tō pakitara. Kua tino roa nei te karangatanga Jafa e whakamahia ana mō ngā tāngata o Tāmaki Makaurau, ā, i taku hokinga mai ko taku hiahia kia whakarerekēhia e au te tikanga o tēnei kupu mā te kī 'he tangata pai anō nō Tāmaki Makaurau' i te mea he tino tāone nui tēnei, nō reira ki a au me whakahīhi te iwi o Aotearoa me Tāmaki Makaurau mō tēnei tāone nui. Ka whakahīhi ai ngā Amerikana ki ō rātau ake tāone, ā, ki a au me pēnei anō tātou i te mea he tāone nui ātaahua tēnei hei whakanui mā tātou. Kāore pea te nuinga o ngā tāngata o Tāmaki Makaurau i te whakamaioha ki te pai o te tāone nui engari mēnā i noho koutou i wāhi kē pēnei i a au ka mōhio koutou he wāhi whakamīharo tēnei.

He maha ngā tuhi pānui i tonoa ōkawatia e au e ngākaunui ana, e whakamere ana rānei ki a au, mai i te ūpoko kōrero a te Pirimia me ngā whakawhanaketanga anamata o Tāmaki Makaurau, tae atu ki ngā whānau kei roto i ngā hākinakina, ka mutu me ngā whakangungutanga wāhanga tōmua a ngā Blues. I te hiahia anō au ki te kōrero mō te hauora hinengaro me te ngana hoki ki te whakamahi i te nūpepa nei kia puta ai he painga ki te iwi whānui.

He rite tonu te pā mai o te uauatanga ki a mātau i runga i te papa whutupōro, ā, kua whakaritea e au kia pokea ngā kairīpoata a te Herald e taua uauatanga mā te whakahau i a rātau ki te tuhi kōrero mō ngā kaupapa tauhou ki a rātau. Kei te hiahia au ki te pānui i ngā whakaaro o Wynne Gray mō ngā mahi tōrangapū, kua whakawhiti mai ia i tana tēpu whutupōro! He mahi pārekareka tēnei, ā, kei te āhua mānukanuka au me te hīkaka tonu mō te otinga o ēnei mahi me te whakaaro anō ka pēhea ki te iwi whānui i te mutunga. I ngana au kia rerekē, kia wairua pai hoki ngā mahi me te aha me taku tūmanako ka pai ki a koutou.

*Ngā mihi,
JK*